

四庫全書

子部

欽定四庫全書

冊府元龜卷七百六十六 宋 王欽若等 撰

總錄部

舉附第二

後周赫連達初姓杜字朔周魏末從清水公賀拔岳征討有功及岳為侯莫陳悅所害軍中大擾趙貴建議迎太祖諸將猶豫未決達曰宇文夏州昔為左丞明略過人一時之傑今日之事非此公不濟趙將軍議是也達

請輕騎告哀仍迎之諸將或欲南追賀拔勝或云東告朝廷達又曰此皆遠水不救近火何足道哉貴於是謀遂定令達馳往太祖見達慟哭問故達以實對太祖遂以數百騎南赴平涼引軍向高平及悅平加平東將軍寇維初從賀拔岳西征方俟醜奴為右都督後俟莫陳悅既害岳欲并其衆時初喪元帥軍中惶擾維於諸將之中最為舊齒素為衆所信乃收集將士志在復讐共相糾合遂全衆而返既至原州衆咸推維為盟主統

岳之衆雖與趙貴等議迎太祖後至侍中

趙善初仕魏為行臺賀拔岳長史岳為侯莫陳悅所害  
善共諸將翊戴太祖乃從平悅

呂思禮為行臺賀拔岳所重岳為侯莫陳悅所害趙貴  
等議遣赫連達迎太祖思禮預其謀及太祖為關西大  
都督以思禮為府長史

梁禦為鎮西將軍從賀拔岳鎮長安及岳被害禦與諸  
將同謀翊戴太祖

若干惠為中堅將軍從賀拔岳西征万俟醜奴及岳為侯莫陳悅所害惠與諸將翊戴太祖乃從平悅後至司空

梁臺為假節衛將軍賀拔岳引為心膂岳為侯莫陳悅所害臺與諸將議翊戴太祖從討悅破之後至鄆州刺史

庫狄昌初從賀拔岳西征及岳為侯莫陳悅所害昌與諸將議翊太祖從平侯莫陳悅後為東夏州刺史

王德字天恩從賀拔岳平隴右為龍驤將軍岳為侯莫  
陳悅所害德與諸將定議迎太祖從平悅後至涇州刺  
史

裴果字戎昭仕魏太昌中為陽平郡丞太祖曾使并州  
與果遇果知非常人密託附馬後為眉復州刺史

申徽初仕東魏為大尉府行叅軍孝武初徽以雒陽兵  
難未已遂間行入關見太祖與語竒之薦之於賀拔岳  
岳亦雅相敬待引為賓客太祖臨夏州以徽為記室參

軍兼府主簿文帝察徵沉密有度量每事信委之乃為

大行臺郎中

王羆初為後魏車騎大將軍涇州刺史未及之部屬太祖徵兵為勤王之舉請前驅効命遂為大都督鎮華州田弘初從爾朱天光為都督及太祖統衆宏求謁見乃論世事深被引納即處以爪牙之任太祖嘗以所著鐵甲賜弘云天下若定還將此甲示孤也後為少保襄州

刺史

梁昕字元明安定烏氏人少溫恭見稱州里太祖之迎  
孝武軍次雍州昕以三輔望族上謁太祖見昕容貌瓊  
偉深賞異之即授右府長流叅軍

周惠達自太祖在魏時即用為秦州司馬安輯隴右及  
太祖為大都督總管兵起雍復以惠達為府司馬便委  
任焉魏孝武詔太祖尚馮翊長公主以惠達為長史赴  
雒陽奉迎至潼關遇孝武已西即令惠達先見太祖謂  
惠達曰昔周之東遷晉鄭是依今乘輿播越降臨關右

吾雖猥當其任而才愧昔人卿宜勑力共成功業以取富貴也對曰惠達宦遊有年屬明公一匡之運富貴之事非所敢望但願明公威德加於天下惠達得效其尺寸則志願畢矣

王思政自太祖為魏丞相中軍大將軍思政雖被任委自以非相府之舊每不自安太祖曾在同州與羣公宴集出錦罽及雜綾絹數段命諸將擄捕取之物既盡太祖又解所服金帶令諸人遍擲曰先得盧者即與之羣

公將遍莫有得者次至思政乃斂容跪坐而自誓曰王  
思政羈旅歸朝蒙宰相國士之遇方願盡心效命上報  
知已若此誠有實令宰相賜知者願擲即為盧若內懷  
不盡神靈亦當明之使不作也便當殺身以謝所奉辭  
氣慷慨一坐盡驚即拔所佩刀橫於膝上攬摶痛拊髀  
擲之比太祖止之已擲為盧矣徐乃拜而受帶自此之  
後太祖寄賞更深轉驃騎將軍

柳虬初為獨孤信開府從事中郎信出鎮龍右因為秦

州刺史以虬為二府司馬雖處元僚不綜府事唯在信  
左右談論而已因使見太祖被留為相府記室追論歸  
朝功封美陽縣男邑二百戶

隋崔仲方年十五與後周太祖諸子同就學時高祖亦  
在其中由是與高祖少相欵密後以明經累遷為少內  
史奉使淮南而還高祖為丞相與仲方相見握手極懽  
仲方亦歸心焉其夜上便宜十八事高祖竝嘉納之又  
見衆望有歸陰勸高祖應天受命高祖從之後至太常

卿信都太守

龐晃仕周為衛王直侍。時高祖出為隨州刺史，經襄陽衛王令。晃詣高祖。晃知高祖非常人，深自結納。及高祖去官歸京師，晃迎見高祖於襄邑。高祖甚懼。晃因白高祖曰：「公相貌非常，名在圖錄。九五之日，希願不忘。」高祖笑曰：「何妄言也！」頃之，有一雉鳴於庭。高祖命晃射之。曰：「中則有賞。」然富貴之日持以為驗。晃既射而中，高祖撫掌大笑曰：「此是天意。公能感之而中也。」因以二婢

賜之情契甚密晃為常山太守高祖為定州總管屢相往來俄而高祖轉亳州總管將行意甚不悅晃陰白高祖曰燕代精兵之處今若動衆天下不足圖也高祖握手曰時未可也及高祖為揚州總管奏晃同行既而高祖為丞相進晃位開府命督左右甚見親待

尉遲崇仕周為儀同大將軍以兵鎮常山時高祖為定州總管崇知高祖相貌非常每自結納高祖甚親待之及為丞相尉遲迎作亂崇以宗族之故自囚於獄遣使

請罪高祖下書慰諭之即令馳驛入朝常置左右  
盧貢仕周為司武上士時高祖為大司武貢知高祖非  
常人深自推結宣帝嗣位加開府及高祖初被顧托羣  
情未一乃引貢置於左右高祖將之東第百官皆不知  
所去高祖潛令貢部伍仗衛因召公卿而謂曰欲求富  
貴者當相隨來往往偶語欲有去就貢嚴兵而至衆莫敢  
動出崇陽門至東宮門者拒不內貢諭之不去瞋目叱  
之門者遂却既而高祖得入貢常典宿衛後至懷州刺

史

郎茂仕周為陳州戶曹屬高祖為亳州總管見而悅之  
命掌書記時周武帝為象經高祖從容謂茂曰人主之  
所為也感天地動鬼神而象經多糾法將何以致茂竊  
歎曰此言豈常人所及也乃陰自結納高祖亦親禮之後  
還家為州主簿高祖為丞相以書召之言及疇昔甚歡  
後至尚書左丞晉陽宮留守

李諤自北齊歸周為天官都上士諤見高祖有奇表深

自結納及高祖為丞相甚見親待後至治書侍御史出  
為通州刺史

郭榮仕周為司水大夫少與高祖相親狎情契極歡嘗  
與高祖夜坐月下因從容謂榮曰吾仰觀玄象俯察人  
事周歷已盡我其代之榮深自結納未幾高祖總百揆  
召榮撫其背而笑曰吾言驗矣即拜相府樂曹參軍後  
至左光祿大夫

柳叢仕周為御節大夫宣帝不豫留侍禁中與劉昉韋

暮皇甫績同謀引高祖入總萬機高祖固讓不許裴進  
曰時不可再機不可失今事已終宜早定計天與不取  
反受其咎如更遷延恐貽後悔高祖從之進位上開府  
拜內史大夫委以機密

竇榮定仕周為佽飛中大夫其妻則高祖姊安城長公  
主也高祖少小與之情契甚厚榮定亦知高祖有人君  
之表尤相推結及高祖作相領左右宮伯使鎮守天臺  
總統露門內兩廂仗衛嘗宿禁中後拜右武衛大將軍

李禮成仕周為民部中大夫妻竇氏早沒知高祖有非常之表遂聘高祖妹為繼室情契甚歡及高祖為丞相進位上大將軍遷司武上大夫委以心膂

陳茂河東猗氏人高祖為隋國公引為寮佐遇待與李圓通等每令典家事未嘗不稱旨高祖善之後遷上士委以心膂及受禪拜給事黃門侍郎

長孫平仕周為小司寇高祖龍潛時與平情好欵洽及為丞相恩禮彌厚後至太常卿判吏部尚書事

李德林仕周為御正下大夫高祖初授顧命令邢國公  
楊惠謂德林曰朝廷賜令總文武事經國任重非羣才  
輔佐無以克成大業今欲與公共事必不得辭德林聞  
之甚喜乃答云德林雖庸懦微誠亦有所在若曲相提  
攜必望以死奉公高祖大悅即召與語劉昉鄭譯初矯  
詔召高祖受顧命輔少主總知內外兵事諸衛既奉勅  
竝受高祖節度鄭譯劉昉議欲授高祖冢宰鄭譯自攝  
大司馬劉昉又求小冢宰高祖私問德林曰欲何以見

處德林曰即宜作大丞相假黃鉞都督內外諸軍事不爾無壓衆心及發喪便即依此以譯為相府長史內史上大夫昉但為相府司馬譯昉由是不平以德林為丞相府屬加儀同大將軍未幾而三方構亂指授兵略皆與之叅詳後為內史令

張叟仕周為儀同高祖為丞相叟深自推結高祖以其有幹用甚親遇之及受禪拜尚書左丞

趙芬仕周為東京小宗伯鎮維陽高祖為丞相尉遲迥

與司馬消難陰謀往來芬察知之密白高祖由是深見  
親委遷東京左僕射

庚季才仕周為開府儀同三司及高祖為丞相嘗夜召  
季才而問曰吾以庸虛受茲顧命天時人事卿以為何  
如季才曰天道精微難可意察竊以人事卜之符兆已  
定季才縱言不可公豈復得為箕穎之事乎高祖默然  
久之因舉首曰吾今譬猶騎虎誠不得下也因賜雜綵  
五十疋絹二百段曰愧公此意宜善為思之後至通直

散騎常侍均州刺史

于翼仕周為幽州總管高祖為丞相尉遲迫作亂遣人誘翼翼鏁其使送之長安高祖甚悅及高祖受禪翼入朝帝為之降榻握手極歡數日拜為大尉

李詢仕周為司衛大將軍高祖為丞相尉遲迫作亂遣韋孝寬擊之以詢為元帥長史委以心膂軍至永橋諸將不一詢密啟高祖請重臣監護高祖遂令高熲監軍與頰同心協力唯詢而已及平尉遲迫進位上柱國改

封龍西郡公賜帛千疋

段文振仕周為天官都上士從韋孝寬經略淮南俄而尉遲迫作亂時文振老母妻子俱在鄴城迫遣人誘之文振不顧歸於高祖高祖引為丞相掾領宿衛驃騎

宇文慶仕周為寧州總管高祖為丞相復以行軍總管南征江表師次白帝徵還以勞進位上大將軍高祖與慶有舊甚見親待令督丞相軍事委以心腹尋加柱國開皇初拜左武衛將軍進位上柱國數年出除涼州總

管歲餘徵還不任以職初帝龍潛時嘗從容與慶言及  
天下事帝謂慶曰天元實無積德臣欽若等曰天元  
後周宣帝尊號視

其相貌壽亦不長加以法令繁苛耽恣聲色以吾觀之  
殆將不久又復諸侯微弱各令就國曾無深根固本之  
計羽翮既翦何能及遠哉尉遲迫貴戚早著聲望國家  
有釁必為亂階然智量庸淺子弟輕佻貪而少惠終致  
亡滅司馬消難反覆之虜亦非池內之物變在俄頃但  
輕薄無謀未能為害不過自竄江南耳庸蜀險隘易生

難沮王謙愚憲素無籌略但恐為人所誤不足為虞未  
幾上言皆驗及此慶恐帝遺忘不復收用欲見舊恩顧  
具錄前言為表而奏之曰臣聞知侔造化二儀無以隱  
其靈明同日月萬象不能藏其狀先天弗違實聖人之  
體道未萌見兆諒達節之神祇伏惟陛下特挺生知徇  
齊誕御懷五岳而猶輕吞八荒而不梗蘊妙見於胸襟  
運奇謀於掌握臣以微賤早逢天眷不以庸下親蒙推  
赤所奉成規纖毫弗舛尋惟聖慮妙出蓍龜驗一人之

慶有徵實天子之言無戲臣親聞親見實榮實喜帝省  
表大悅下詔曰朕之與公本來親密懷抱委曲無所不  
盡話言歲久尚能記憶今覽表奏方悟昔談何謂此言  
遂成實錄古人之先知禍福明可信也朕言之驗自是  
偶然公乃不忘彌表誠節深感至意嘉尚無已自是帝  
每加優禮

楊素仕周為車騎大將軍及高祖為丞相素深自結納  
高祖甚器之以素為汴州刺史

元景山仕周為亳州總管高祖為丞相尉遲迥稱兵作亂榮州刺史宇文胄與迥通謀陰以書諷景山景山執其使封書詣相府高祖甚嘉之進位上大將軍

李穆仕周為大佐輔總管高祖作相尉遲迥之亂也遣使招穆穆鎖其使上其書穆子士榮以穆所居天下精兵處陰勸穆反穆深拒之乃奉十三環金帶於高祖蓋天子之服也李渾穆第十子仕周為左侍上士尉遲迥反於鄴時穆在并州高祖慮其為迥所誘遣渾乘驛

往布腹心穆遽令渾入京奉熨斗於高祖曰願執威柄  
以尉安天下也高祖大悅又遣渾詣韋孝寬所而述穆  
意焉

柳昂仕周為大內史致位開府高祖為丞相深自結納  
高祖大悅之以為大宗伯昂受拜之日遂得偏風不能  
視事高祖受禪昂疾愈加上開府拜潞州刺史

李安字玄德高祖作相引之左右遷職方中大夫復拜  
安弟熾為儀同安叔父梁州刺史璋時在京師與周趙

王謀害高祖誘樊為內應樊謂安曰寢之則不忠言之則不義失忠與義何以立身安曰丞相父也其可背乎遂陰白之及趙王等伏誅將加官賞安頓首而言曰兄弟無汗馬之勞過蒙獎擢合門竭節無以酬謝不意叔父無狀為克黨之所熒惑覆宗絕嗣其甘若薺蒙全首領為幸實多豈可將叔父之命以求官賞於是俯伏流涕悲不自勝高祖為之改容曰我為汝特存璋子乃命有司罪止璋身高祖亦為安隱其事而不言尋授安開

府

唐崔善為隋仁壽中為樓煩郡司戶書佐高祖時為太  
守甚禮遇之善為以政傾頽乃密勸進高祖深納之  
武士彟并州文水人家富於財頗好交結高祖初行軍  
於汾晉休止其家因蒙顧接後為晉陽宮留守府司鎧  
參軍事既而隋政日亂盜賊蜂起士彟每歎息以夷難  
為心而恨未遇真主及高祖為太原留守甚見接待數  
訪以時事士彟嘗詰朝於街內獨行聞空中有言曰唐

公是天子士穀尋聲不見有人仍以此言白高祖并進  
兵書高祖悅之曰勿多言兵書禁物尚能將來深識好  
心當同富貴耳其夜士穀夢高祖乘馬上天旦以狀聞  
高祖大悅於是入卧內委以心腹後至荊州都督

任瓊仕隋仁壽中為韓城尉高祖討捕於汾晉瓊謁高  
祖於轅門承制為河東縣戶曹高祖將之晉陽留隱太  
子建成以託於瓊義師起瓊至龍門謁見高祖謂之曰  
隋氏失馭天下沸騰吾忝以外戚屬當重寄不可坐觀

時變晉陽是用武之地士馬精強今率驍雄以匡國難  
卿將家子深有智謀觀吾此舉將為濟否壞曰後主殘  
酷無道征役不息天下恂恂思聞拯亂天縱神武親舉  
義師所下城邑秋毫無犯軍令嚴明將士用命關中所  
在蜂起唯待義兵仗大順從衆欲何憂不濟環在馮翊  
積年人情諳練願為一介之使銜命入闕同州已東必  
當欵伏於梁山船濟直指韓城進逼郃陽分取朝邑且  
蕭造文吏本無武略仰懼威靈理當自下孫華諸賊未

有適從必當相率而至然後鼓行整衆入據永豐雖未得京城關中故已定矣高祖曰是吾心也乃授銀青光祿大夫遣陳演壽史大柰領步騎六千趨梁山渡河使瓊及薛獻為招慰大使高祖謂演壽曰閻外之事宜與任瓊等之孫華白玄度等聞兵且至果競來降并具舟于河師遂利涉瓊說下韓城縣與諸將進擊飲馬泉破之拜左光祿大夫留守永豐倉

宇文士及仕隋為尚輦奉御時高祖為殿內少監士及

深自結託及隨兄化及至黎陽高祖手詔召之士及亦  
潛遣家僮間道詣長安申赤心又因使密貢金環高祖  
大悅謂侍臣曰我與士及素經共事今貢金環是其來  
意也化及至魏縣兵威日蹙士及勸之西歸長安化  
及不從士及乃與封倫求於濟北徵督軍糧俄而化及  
為竇建德所擒濟北豪右多勸士及發青齊之衆北擊  
建德收河北之地以觀形勢士及不納遂與封倫等來  
降高祖數之曰汝兄弟率思歸之卒為人闖之計當此

之時若得我父子豈肯相存今欲何地自處士及謝曰  
臣之罪誠不容誅但臣早奉龍顏久存心腹往在涿郡  
嘗夜中密論時事後於汾陰宮復進丹赤自陛下龍飛  
九五臣實乃心西歸所以密申貢獻冀此贖罪耳高祖  
笑謂裴寂曰此人與我言天下事至今已六七年矣公  
輩皆在其後時士及妹為昭儀有寵由是漸見親待授  
上儀同

唐儉父鑒與高祖有舊同領禁衛高祖於太原留守儉

與太宗周密從容進說以隋室昏亂天下可圖太宗以  
白高祖乃詔入密訪時事對曰明公日角龍庭李氏又  
在圖牒天下屬望非是一朝若開府庫南嘯豪傑北招戎  
狄東收燕趙長驅濟河據有秦雍海內之權指麾可取  
願引達節以順羣望則湯武之業於公不遠負鼎投竿  
亦先微願高祖曰湯武之事非所庶幾今天下已亂言  
私則圖存語公則拯溺抑宜自愛吾將思之後拜大將  
軍府檢較記室叅軍

劉義節太原人高祖之作鎮也甚接以恩意又出入王威高君雅之門然獨歸心於高祖義兵將起威與君雅內懷疑貳義節輒探得其計以白高祖及誅威等頗用其力

劉文靜隋末為晉陽令時高祖鎮太原文靜初觀太宗謂裴寂曰非常人也大度類於漢高神武同於魏帝其年雖少乃天縱也寂未然之於後文靜為李密親戚被煬帝勅禁太宗陰有異心以文靜可與語遂入禁所看

之文靜大喜而感賀亦覺太宗有非常之意因歎曰天下大亂非有湯武高光之才不能定也太宗知其意潛相感動報之曰卿安知無但恐常人不別耳文靜起而謝曰久知郎君乃龍潛也今既時事如此正是騰躍之秋素烹膺籲之資仍懷撥亂之道此乃生人有息肩之望文靜知攀附之所矣太宗曰今入禁所相看非兒女之情相憂而已時事如此知君若可與言故來與君圖舉大計君能如此深副僕懷卿志識大佳宜籌其事文

靜對曰今李密長圍睢邑主上流播淮南大賊連州郡  
小盜阻山澤者以千萬數矣但須真主驅駕取之誠能  
應天順人舉旗大呼則四海不足定也今并州百姓避  
盜賊者入此城文靜為令數年知其豪傑一朝嘯集立  
地可數萬人尊公所領之兵復且數萬一言出口誰敢  
不從乘虛入闢號令天下不盈半歲帝業可成帝笑曰  
卿言善合人意於是部署賓客陰圖起義計議既定候  
機當發欲白高祖慮必不從欲竊發之又恐驚於高祖

於是計無所決沉吟者久之既見高祖厚於裴寂欲因  
寂開說於是引寂交於太宗得通議謀及高祖被拘太  
宗又遣文靜共寂進說曰易稱知幾其神乎今大亂已  
作公處嫌疑之地當不賞之功何以圖全晉陽之土士  
馬精銳宮監之中府庫盈積以茲舉事可立大功關中  
天府代王沖幼權豪並起未有適從願公興兵西入以  
圖大事何乃拘於一介之使乎高祖然之太宗潛結死  
士與文靜等協議尅日舉兵會高祖得釋而止乃命文

靜詐為煬帝勅發太原西河雁門馬邑數郡人二十以上五十以下悉為兵以歲暮集涿郡將伐遼東由是人情大擾思亂者益衆文靜與裴寂偽作符敕出宮監庫物以供留守資用募兵集衆及義兵起以文靜為司馬勸改旗幟以章義舉後至兵部尚書

唐憲仕隋東宮左勳衛太子廢歸太原高祖之鎮太原也頗蒙親遇因與弟儉預義謀及大將軍府建拜正議大夫引置左右為恩信從平宋老生破京城時隱太子

為左鎮大都督以憲為長史累遷光祿大夫封安富縣  
公武德初拜為太子右虞侯卒

于百億仕隋為左翊衛高祖義旗之舉仗劍歸順授朝  
請大夫

盧赤松隋末為河東令與高祖有舊聞義師至霍棄縣  
迎接拜行臺兵部郎中厯位率更令封范陽郡公

盧士馭高祖與之有舊及義兵起士馭率數百人謁高  
祖於汾陰令其兄子師洽諭賊帥孫華應時歸附又與

劉宏基敗隋將桑顯和於飲馬泉累加右光祿大夫  
竇抗與高祖少相親狎楊玄感之反也高祖統兵隴右  
言於高祖曰玄感抑為發蹤耳李氏當膺圖錄可見機  
而作也高祖不許隋末令於靈武巡長城伺盜及聞高  
祖定京師抗對衆而忭曰此吾家妹婿也豁達有大度  
真撥亂之主也因歸長安後至左武威大將軍

田德平太原晉陽人隋末補鴈揚府正高祖留守太原  
引為兵大蒙任寄義師起拜銀青光祿大夫歷大將軍

兵曹叅軍封漁陽縣公

蘭謨仕隋為膺揚郎將留守臨汾高祖義旗建帥所部  
來降授銀青光祿大夫

姜確字行本父暮從起太原官至秦隴二州刺史確自  
高祖義旗初舉以典籤從後厯通事舍人尚書水部二  
曹郎中封通川縣男

溫大雅仕隋為長安縣尉以父憂去職後以天下方亂  
不求仕進及義兵起高祖引為記室叅軍專掌文翰禪

代之際與竇威參定朝儀後至禮部尚書

柏李纂隋末為祁縣長有能名及義兵起歷大將軍府  
騎曹叅軍從平京城累以軍功位至上柱國

段綸仕隋為左親衛隱太子見而悅之妻以琅琊長公  
主舍高祖之舊第數聞鼓吹之音視之無所覩綸謂主  
曰聞圖識李氏當王今於第內有此禎祥必而家應籙  
之徵也及義兵西邁綸於藍田聚結兵馬得萬餘人迎  
接大軍拜金紫光祿大夫領親信左右從平京城封龍

岡郡公

黨仁弘仕隋為武勇郎將高祖起義軍次蒲坂仁弘招率鄉曲得二千餘兵迎謁拜銀青光祿大夫

長孫敞隋末為左衛郎將義旗入關敞率子弟以新豐縣來迎高祖大悅授銀青光祿大夫尋加上柱國

喬軌隋末為右武侍及義師渡河軌乃迎謁授通議大夫從平京城頻以戰功累加上柱國秦王府車騎將軍顏師古仕隋為襄州安養尉坐事免歸長安家貧以教

授自業及高祖義兵入闕師古於長春宮上謁授朝請大夫從平京城補秦府文學後至秘書監弘文館學士崔幹略隋末為醴泉縣令高祖義兵入闕以縣來降授丞相府主簿及受禪遷黃門侍郎

靳孝謨仕隋朝邑縣法曹及義兵濟河以蒲津中渾二城歸義授正議大夫

竇軌隋末為資陽郡東曹掾去官歸於家及義兵入闕軌聚衆千餘人迎於同州高祖見之大悅降席起迎握

手歡笑賞錫優厚尋令收兵於渭南得衆一萬拜丞相  
諮議參軍從平京師累加光祿大夫

孫華隋末坐事逃歸山賊郭伏願侵掠馮翊及義師起  
高祖見華貌寢初輕之及與語大悅握手引與同坐謂  
之曰吾昨夜夢乘白龍以濟黃河卿將白玄度來又具  
舟櫂何與吾夢之相符也因拜為光祿大夫前軍總管  
常達隋末為隴州刺史為降人忤仕政所劫擁城中二  
千人叛入薛仁果達性剛烈有武藝高祖龍潛時數從

征伐甚蒙深待及義兵起達在霍邑從宋先生來拒戰既斬先生高祖謂達已死令人閱屍以求及達奉見高祖大悅因蒙任使屢有軍功

梁朱珍徐州豐人太祖起兵珍與龐師古許唐李暉丁會氏叔琮鄧季筠王武等八十餘人以中消從摧堅陷陳所向盡決後署諸軍都指揮使

龐師古曹州南華人以中消從太祖性端愿未嘗離左右及太祖鎮汴樹置戎伍始得馬五百匹即以師古為

偏將援陳破蔡累有戰功後至徐州節度使

謝瞳唐末舉進士不中第遂投跡於太祖泊居門下未嘗一日不在左右及太祖據同州遂署右職後為宣義軍兩使留守

李振字興緒唐末為台州刺史不克蒞事因而歸過汴求謁見太祖太祖與語大奇之辟為從事以講武政於是陳耕戰之計進鳩合之策尊王室以圖諸侯獎帝道以雜霸業嫉閻寺敦儒術尚名器審刑罰於是禮遇彌

篤後至戶部尚書崇政院使

牛存節唐末勅事河陽節度使諸葛與與卒存節謂同輩曰天下汹汹當擇英主事之以圖富貴遂歸於太祖授宣義軍小將後至鄆州節度使

後唐康君立蔚州興唐人世為邊豪唐乾符中為雲州牙校事防禦使段文楚時羣盜起河南天下將亂代北仍歲阻饑諸部豪傑咸有嘯聚邀功之志會文楚稍削軍人儲給戍兵咨怨君立與薛鐵山程懷信王行審李

存璋謀曰段公儒人難與共事方今四方雲擾皇威不振丈夫不能於此時立功立事非人豪也吾等雖權部衆然以雄勁聞於時者莫若沙陁部落又李振武父子勇冠諸軍吾等合勢推之則代北之地旬月可定功名富貴事無不濟也君立等乃夜謁武皇言曰方今天下大亂天子付將臣以邊事歲遭荒饑使削儲給我等邊人馬能守死公家父子素以威惠及五部當共除虐帥以謝邊人孰敢異議者武皇曰明天子在上舉事當有

朝興公等勿輕議予家尊遠在振武萬一相迫候予稟  
命君立等曰事機已泄遲則變生曷候千里咨稟衆因  
聚躁擁武皇比及雲州衆且萬人師營鬪雞臺城中械  
文楚以應武皇之軍既收城推武皇為大同軍防禦留  
後衆狀以聞後武皇授鴈門節度以君立為左都押衙  
後至昭義軍節度使

蓋寓蔚州人世為牙校武皇起雲中寓與康君立等推  
轂佐佑之因為腹心武皇節制鴈門署職為都押衙領

嵐州刺史洎移鎮太原改左都押衙武皇與之決事言無不從凡出行靡不衛從後至容館經略使

劉彥琮雲中人唐末武皇作鎮晉陽有撥亂失亮之志彥琮乃謁於軍門致之麾下自是從征興復王室後至邠州節度使

李承約為山後八軍巡檢使屬劉守光因殺兄名儒宿將嘗事其父兄者多無辜被戮承約自以握兵在外心不自安時武皇召募英豪方開王業乃以所部二千騎

歸於并州即補定霸都指揮使檢較右僕射兼貝州刺史

張遵誨父為宗城令羅紹威殺衙軍之歲為梁軍所害  
遵誨奔太原武皇以為牙門將時朱溫篡逆據有兩京  
武皇與鄒鳳同謀興復命遵誨知岐州留務在岐下累  
年莊宗平定山東遵誨以典客從歷幽鎮二府馬步都  
虞侯

張廷裕代北人幼事武皇於雲中從平黃巢討王行瑜

自行間漸升為小將莊宗定魏補天雄軍左廂馬步都  
虞侯歷蔚茲隰三州刺史

曹廷隱本魏州人為本州典謁虞侯賀德綸西迎莊宗  
於晉陽莊宗既得鄆城擢為馬步都虞侯軍中號為稱  
職

何瓊閩人唐天祐三年登進士第謁莊宗於晉陽一見  
受知辟河東推官轉留府判官

段凝開封人唐末為澠池主簿脫荷衣以事梁祖梁祖

漸器之開平三年十月自東頭供奉官授右威衛大將軍充左軍巡使兼水北巡簡使

賈餗在鎮州幕府張文禮殺王鎔時莊宗未即尊位文禮遣餗至鄆都勸進自留鄆下樓遲郵舍莊宗即位授鴻臚少卿

王鎔唐末為鎮州節度莊宗征劉守光迴鎔至承天軍與莊宗合宴同盟奉觴獻壽以中感慨莊宗以鎔父友曲加敬異為之聲歌鎔亦報之謂莊宗為四十六舅飲

中莊宗抽佩刀斷衿為盟許以女妻鎔子昭誨因茲堅附於莊宗矣

孔循同光末權知汴州事會明宗自鄆都至循致餼勞軍供備充至明宗悅及定京師為樞密使兼秘書監

晉高漢筠初仕梁為衛州衛校後唐莊宗入魏分兵諭其屬郡漢筠以利病說衛之牧守俾送款於莊宗以漢筠為功尋移睢州都校後至左驍衛大將軍內省客使皇甫立代北人後唐明宗刺伐州署為衛校從歷藩鎮

性純謹明宗深委信之王建丘安誨策名委質皆在五  
後明宗踐阼以立為忻州刺史

長從簡初仕後唐為潁州團練使高祖舉義清泰末詔  
赴闕充副招討使隨駕至孟津除河陽節度使時趙延  
壽軍敗偽王斷浮橋歸雖從簡守河陽南城高祖自北  
而至從簡察軍情離散遂渡河迎謁焉後至左金吾衛  
將軍

桑維翰性明慧善詞賦後唐同光中登進士第高祖領

河陽辟為掌書記歷數鎮皆從之後至中書令

曹國珍高祖在藩時嘗通私謁以兄事之及即位國珍  
自比於嚴陵上表叙舊由是自吏部郎中拜左諫議大  
夫給事中

孟承誨大名人始為本州衙校遇高祖臨其地升為客  
將後奏為宗城常山橐城三令皆有善政高祖有天下  
擢為閣門副使

周環晉陽人自高祖厯鎮藩翰用為腹心累職至衙門

都校凡帑廩出納咸以委環經十餘年未嘗以微累見誤高祖甚重之及即位命權判三司事後至安州節度使

李承福初為高祖家臣高祖登極歷皇城武德宣徽使  
左千牛大將軍

劉處讓後唐末為左驍衛大將軍河北都轉運使高祖  
舉義兵於太原處讓從至雒陽乃授宣徽北院使

劉繼勲衛州人高祖鎮鄆都時繼勲為客將高祖愛其

端謹籍其名於帳下從厯數鎮及即位擢為閣門使

漢王景崇邢州人後唐明宗之鎮邢州景崇為牙將明

宗以其明敏憐之自後累鎮皆致麾下明宗踐阼擢為

通事舍人歷引進閣門使晉末遷左金吾大將軍充街

使嘗以人主用才不盡憤然不樂契丹蕭翰立許王李

從益知軍國事署為宣徽使監左藏庫蕭翰歸蕃景崇

聞高祖起河東西陝幸滿乃私取庫金請行迎奉從益

不能制遇高祖于河雒駕至汴削其偽官授右衛大將

卷

任庭浩并州人業術數風雲之事晉高祖在太原重圍時高祖最為親要庭浩以本業請見高祖甚加禮遇晉天福初庭浩授太原掾尋改交城文水令皆高祖獎薦之力也後為殿中監

翟光鄆晉末為宣徽使時寇犯闕以後唐明宗少子許王從益為曹州節度使從益母淑妃王氏白於寇長以從益未諳政術請以光鄆代知州事寇從之及蕭翰推

從益僭位以光鄴為樞密使寇去光鄴以高祖進兵汾  
水請從益去號稱梁王仍馳表稱臣論者賞之高祖入  
汴加右領衛大將軍

趙暉晉開運末為軍校以部兵屯於陝屬北戎入寇慨  
然有憤激之意及聞高祖建義於并門乃與部將王晏  
侯章戮力協謀戮契丹偽命官屬據有陝州即時馳騎  
聞於高祖高祖乃命暉為保義軍節度陝虢等州觀察  
處置等使高祖之幸東京出於陝暉戎服朝於路左手

卷之六十一  
七  
控六龍達于行宮君臣之義如舊結焉

李守貞河陽人事本郡為牙將晉高祖鎮河陽用為典客從數鎮皆從之及即位累遷至省客使

聶文進并州人少給事於高祖帳下高祖鎮太原甚見委用職至兵馬押司官高祖入汴授樞密院承旨歷領軍屯衛大將軍遷右領軍大將軍并仍舊職

閻晉卿忻州人少仕并州歷職至客將高祖在鎮頗見信用後歷閣門使判四方館事

郭允明父徽柔為河東制置使徽柔被誅允明遂為高祖廝養服勤既久頗得高祖之歡心高祖鎮太原稍歛牙職及即位累遷至翰林茶酒使兼鞍轡庫使

周史彥超漢末為龍樓都指揮使太祖之赴內難彥超以本軍從後至鄭州防禦使

李彥碩字德修本以商賈為業太祖鎮鄆寘之左右及即位歷綾綿副使榷場使

陳光穗為鄆都副留守廣順中高祖賜詔書曰汝澶淵

倅職之時值漢室釁生之際潛齋密旨將陷朕躬神色  
不祐於苞藏機事尋當於發露汝稟勲賢之指使效奔  
走之勤勞徑自河壩報於鄴下忠孝之規迥著旌猷之  
道未弘每懼朕懷仍宣公論宜膺列郡用賞前功今授

汝博州刺史

冊府元龜卷七百六十六

欽定四庫全書

子部

冊府元龜卷七百六十七至九

詳校官中書臣吳璣

侍讀臣孫球覆勘

總校官庶吉士臣何思鈞

校對官助教臣胡子襄

謄錄監生臣孔繼峯

欽定四庫全書

冊府元龜卷七百六十七

宋 王欽若等 撰

總錄部

儒學

周官著師儒之訓太史公論儒者之要始於博習經藝  
之文祖述堯舜之道其後分而為六家蔓而成九種至  
於憲章仁義順陰陽明天道宣教化正人倫以致乎至  
治固異端之不能奪也春秋之世施及戰國聖師云沒

微言誕布學者間出素風益邵雖復遭坑焚之變而鄒魯之俗弦誦無改大漢龍興罷出百家表章經術建立學官予以祿利修復費校風以德化傳受彌廣藝文不墮蓋西京之士彬彬矣中興崇學於茲為盛魏晉以降未之或替豈不以六君子之訓四術之教乃百王之所取法千古所不易者也今悉其志學成業顯名於世者著於篇

倚相楚人為左史能讀三墳五典八索九丘即上世帝

王遺書也

孔子魯人為兒嬉戲嘗陳俎豆設禮容其後適周問禮  
蓋見老子時周室微而禮樂廢詩書缺追述三代之禮  
序書傳上紀唐虞之際下至秦繆編次其事故書傳紀  
自孔子古者詩三千餘篇及至孔子去其重取可施於  
禮義上采契后稷中述殷周之盛至幽厲之缺始於莊  
席故曰關雎之亂以為風始鹿鳴為小雅始文王為大  
雅始清廟為頌始三百五篇孔子皆弦歌之以求合韶

武雅頌之音禮樂自此可得而述以備王道成六藝孔子  
晚喜易序彖繫象說卦文言讀易韋編三絕曰假我數  
年若是我於易則彬彬矣孔子以詩書禮樂教弟子蓋  
三十焉身通六藝者七十有二人孔子嘗為魯司寇孔  
子卒後七十子之徒散遊諸侯大者為師傳鄉相小者  
友教士大夫或隱而不見故子路居衛按仲尼弟子列傳子路死於衛

時孔子子張居陳澹臺子羽居楚子夏居西河子貢終  
尚存

夏之倫為王者師是時獨魏文侯好學後凌遲以至於始皇天下於戰國儒術既紕焉然齊魯之間學者  
獨不廢也

孟軻鄆人生有淑質夙喪其父幼被慈母三遷之教長  
師孔子之孫子思知儒術之道通五經尤長於詩書

荀卿趙人與孟子咸遵夫子之業而潤色之以學顯於  
當世嫉濁世之政亡國亂君相屬不遂大道而營於巫  
祝信機祥鄙儒小拘如莊周等又滑稽亂俗於是推儒  
墨道德之行事興懷序列著數萬言荀卿在齊三為祭

酒後適楚為蘭陵令而卒於蘭陵

漢叔孫通

一云名何

薛人秦時以文學徵待詔博士高祖初

為漢王復拜為博士漢五年已并天下諸侯共尊漢王

為皇帝叔孫通使徵魯諸生三十餘人與其弟子百餘

人共起朝儀

事具掌禮  
制禮門

乃拜為太常賜金五百斤叔孫

通因進曰諸弟子儒生隨臣久矣與共為儀願陛下官

之高帝悉以為郎

申公培魯人以詩經為訓高祖過魯申公以弟子從師

入見高祖於魯南宮後官至大中大夫

伏勝濟南人故為秦博士文帝時欲求能治尚書者天下無有乃聞伏生能治欲召之是時伏生年九十餘老不能行於是乃詔太常使掌故朝錯往受之

賈誼雒陽人年十八以能誦詩書屬文稱於郡中河南太守吳公徵為廷尉言誼少通諸家之書文帝召為博士修春秋左氏傳為傳訓終於梁王傳

董仲舒廣川人少治春秋景帝時為博士通五經能持

論善屬文漢興至於五世之間唯仲舒為明於春秋其傳公羊氏也

胡母生字子都齊人治公羊春秋景帝時為博士齊之言春秋者多受胡母生

輞固生齊人以治詩景帝時為博士

毛公趙人治詩為河間獻王博士

戴德字延君號大戴為信都太傅

公孫弘菑州薛人學春秋雜說武帝初即位招賢良文

學士是時宏年六十以賢良徵為博士

兒寬千乘人治尚書有俊材初見武帝語經學帝曰吾始以尚書為樸學弗好及聞寬說可觀乃從寬問一篇位至御史大夫

吾丘壽王武帝時為待詔詔使從中大夫董仲舒受春秋高材通明遷為侍中

馮野王通詩以父任為太子中庶子  
龔遂以明經為昌邑郎中令

夏侯始昌魯人通五經以齊詩尚書教授自董仲舒韓  
嬰死後武帝得始昌甚重之時昌邑王以少子愛上為  
選師始昌為太傅

張禹至長安學從沛郡施讐受易琅邪王陽膠東庸生  
問論語既皆明習有徒衆舉為郡文學

韓嬰燕人為常山王太傅推詩人之意作外傳數萬言  
武帝時與董仲舒論於帝前其人精悍處事分明悍勇

仲舒不能難也

榮廣受穀梁先是公羊大興穀梁寢微廣高材捷敏與  
公羊大師眭孟等論數用之故好學者頗復受穀梁  
蔡千秋字少君宣帝即位聞衛太子好穀梁春秋以問  
丞相韋賢長信少府夏侯勝及侍中樂陵侯史高皆魯  
人也言穀梁子本魯學公羊氏乃齊學也宜興穀梁時  
千秋為郎召見與公羊家並說帝善穀梁說擢千秋為  
諫大夫給事中

韋玄成宣帝時為淮陽王中尉王未就國玄成受詔與

太子太傅蕭望之及五經諸儒雜論同異於石渠閣條奏具對

劉向時為諫大夫以偽鑄黃金減死論會初立穀梁春  
秋徵更生受穀梁講論五經於石渠

施讐為博士甘露中與五經諸儒雜論同異於石渠閣

石渠閣在未央殿北以藏秘書

梁丘、臨為黃門郎甘露中奉使問諸儒於石渠臨學精  
熟專行京房法鄉邪王吉通五經聞臨說善之

聞人通漢子方

聞人姓也名通漢字子方

以太子舍人論石渠

戴聖以博士論石渠

夏侯勝亦以儒顯名為學精熟善說禮服徵為博士

后蒼字近君東海剡人事夏侯始昌始昌通五經蒼亦

通詩禮為博士

周堪字少卿齊人與孔霸俱事大夏侯勝霸為博士堪

譯官令論於石渠經為最高

張山拊字長賓平陵人事小夏侯建為博士論石渠

張無故字子儒山陽人事山拊受尚書善修章句為廣陵太傅

孔安國字子國孔子之後孔氏有古文尚書安國以今文字讀之因以起其家逸書得十餘篇蓋尚書茲多於是矣以安國為諫大夫

韋賢為人質樸欲篤志於學兼通禮尚書以詩教授號稱鄒魯大儒為丞相薨子玄成復以明經厯位至丞相故鄒魯諺曰遺子黃金滿籯不如一經

匡衡字稚圭父世農夫至衡好學家貧庸作以供資用尤精力過絕人諸儒為之語曰無說詩匡鼎來

鼎猶言嘗也言

匡且來也賈誼云天子春秋鼎盛其義亦同匡語詩解人頤衡後位至丞相

嚴彭祖與顏安樂俱事眭孟弟子百餘人惟彭祖安樂為明由是公羊春秋有顏嚴學彭祖為宣帝博士

翼奉字少君東海下邳人治齊詩與蕭望之匡衡同師三人經術皆明元帝初即位諸儒薦之徵待詔宦者署後以中郎為博士諫大夫卒

師丹字仲公治詩舉孝廉為郎元帝末為博士免建始中州舉茂材復補博士

翟方進為小史心厭之聞蔡父言當以經術封侯心喜因病歸家辭其後母欲西至京師受經母憐其幼隨之長安織屨以給方進讀經博士受春秋積十餘年經學明習徒衆日廣諸儒稱之以射策甲科為郎位至丞相徐故治詩授於九江陳狹為王莽講學大夫由是言毛詩者本之徐教

谷永於經書汎為疏達與杜欽杜鄴略等不能洽決如  
劉向父子及揚雄也其於天官京氏易最密位至大司  
農

梅福字子真九江壽春人少學長安明尚書穀梁春秋  
為郡文學後為南昌尉

揚雄字子雲少而好學不為章句訓詁通而博覽無所  
不見位至大夫

後漢卓茂字子康南陽宛人元帝時於長安事博士江

生習詩禮及歷算究極師法稱為通儒

賈逵父徽從劉歆受左氏春秋兼習國語周官又受古文尚書於塗惲學毛詩於謝曼卿作左氏條列二十一  
篇

桓譚博學多通徧習五經皆訓詁大義不為章句能文章尤好古學數從劉歆揚雄辨析疑異譚後官至六安

郡丞

張玄字君夏少習顏氏春秋兼通數家法建武初舉明

經補弘農文學

丁菴字子然習公羊顏氏春秋學義精明建武初為諫議大夫博士

牟長字君高樂安臨濟人少習歐陽尚書不仕王莽時建武初大司空宋弘特辟拜博士

魏應字君伯少好學建武初詣博士受業習魯詩閉門誦習不交僚黨京師稱之應終騎都尉

洼丹字子玉世傳孟氏易建武初為博士丹學義研深

易家宗之稱為大儒

杜林少好學沈深父鄴為梁州刺史家既多書又外氏  
張竦父子喜文采鄴少孤其母張敬女也鄴從敬子吉學得其家書竦即吉之子傳學文雅

過於林從竦受學博洽多聞時稱通儒王莽敗避難客  
河西建武六年光武聞林已還三輔乃徵拜侍御史引  
見問以經書故舊及西州事甚悅之賜車馬衣被羣僚  
知林以名德用甚尊憚之京師士大夫咸推其博洽河  
南鄭興東海衛宏等皆長於古學興嘗師事劉歆林既

遇之欣然言曰林得興等固諧矣使宏得林且有以益  
之宏見林閑然而服濟南徐巡始師事宏後皆更受林  
學林前於西州得漆書古文尚書一卷嘗寶愛之雖遭  
艱困屈時不離身出以示宏等曰林流離兵亂嘗恐斯  
經將絕何意東海衛子濟南徐生復能傳之世道竟不  
墜於地也古文雖不合時務然願諸生無悔所學巡益  
重之於是古文遂行位至大司空

任安字定祖少遊大學受孟氏易兼通數經除博士公

車徵皆稱疾不就

甄宇字長文北海安丘人習顏氏春秋建武中為州從事徵拜博士

包咸子良少為諸生受業長安師事博士右師細君姓古

師習魯詩論語舉孝廉為郎建武中入授皇太子論語又為其章句

劉寬少學歐陽尚書京氏易尤明韓詩外傳稱為通儒入為光祿勳卒

楊政字子行京兆人少好學從代郡范升受梁丘易善說經書京師為之語曰說經鏗鏗楊子行終於左中郎將

戴憑字次仲習京氏易年十六舉明經徵試博士

鍾興少從少府丁恭受嚴氏春秋恭薦興學行高明光武召見問以經義應對甚明帝善之位至左中郎將卒張玄少習顏氏春秋後舉孝廉為郎會顏氏博士缺元試策第一拜為博士居數日諸生上言玄兼說嚴氏宣

氏不宜專為顏氏博士光武且令還署未及遷而卒  
董鈞字文伯犍為資中人習慶氏禮事大鴻臚王臨永  
平初為博士當世稱為通儒

衛宏字敬仲東海人少與河南鄭興俱好古學初九江  
謝曼卿精毛詩宏從曼卿受學後從大司空杜林更受  
古文尚書時濟南徐巡師事宏後從林受學亦以儒顯  
由是古學大興光武以為議郎

周防字偉公師事徐州刺史蓋豫受古文尚書經明舉

孝廉拜郎中太尉張禹薦補博士

楊倫字仲理少為諸生師事司徒丁鴻習古文尚書為  
郡文學掾後特徵博士

李育字元春扶風漆人少習公羊春秋沈思專精博覽  
書傳知名太學後為侍中卒於官

何休字邵公任城樊人精研六經世儒無及者位至諫  
議大夫

謝該字文儀南陽章陵人善明春秋左氏為世明儒後

拜議郎以壽終

周燮十歲通詩論及長專精禮易徵之不就

陳元父欽習左氏春秋事黎陽賈護與劉歆同時而別

自名家

元父欽字子佚以左氏授王莽自名陳氏春秋後辟司徒歐陽欽府以病

去卒

鄭衆字仲師年十二從父興受左氏春秋精力於學明三統厯兼通易詩知名於世位至大司農卒

承官少勤學不倦經典既明歸家教授三府更辟皆不

應永平中徵詣公車車駕臨辟雍召宮拜博士

侯霸篤志好學師事九江太守房元治穀梁春秋為元

都講又從鍾寧  
君受律位至大司徒

鄭興少學公羊春秋晚善左氏傳遂積精深思通達其  
旨同學者皆師之興從博士金子  
嚴為左氏春秋後為蓮勺令以事免

卒

魯恭始為郡吏太傅趙熹聞而辟之章帝集諸儒於白  
虎觀恭特以經明得名與其議後位至司空

王渙敦儒學習尚書讀律令略舉大義官至雒陽令卒周舉字宣光姿貌短陋而博學洽聞為儒者所宗故京師為之語曰五經從橫周宣光終於光祿大夫

井丹字大春少受業太學通五經善談論故京師為之語曰五經紛綸井大春性清高沛王輔等五王更請皆不能致

尹敏少為諸生初習歐陽尚書後受古文兼善毛詩穀梁左氏春秋後為諫議大夫卒

許慎字叔重性淳篤少博學經籍馬融嘗推敬之時人

為之語曰五經無雙許叔重除洨長卒於家

洨音侯  
交切

蔡玄字叔陵學通五經徵辟並不就順帝時詔徵拜議郎講論五經異同甚合帝意遷侍中出為弘農太守卒

于官

宗資少在京師學孟氏易歐陽尚書

楊震字伯起少好學受歐陽尚書於太常桓郁明經博覽無不窮究諸儒為之語曰關西孔子楊伯起位至太

尉

趙曄詣杜撫受韓詩究竟其術作詩細歷神淵蔡邕至會稽讀詩細而歎息以為長於論衡邕還京師傳之學者咸誦習焉

張馴字子雋濟陰定陶人少游太學能誦春秋左氏傳以大夏侯尚書教授辟公府舉高第拜議郎與蔡邕共奏定六經文學擢拜侍中典領祕書近署

魏樂詳字文載少好學善左氏傳杜畿為太守亦甚好

學署詳文學祭酒使教後進於是河東學業大興至黃  
初中徵拜博士于時太學初立有博士十餘人學多褊  
狹又不熟悉略不親教脩員而已惟詳五業並授其或  
難教質而不解詳無慍色以杖畫地牽譬引領至忘寢  
食以是獨擅名於遠近

孫資字彥博講業太學博覽傳記同郡王允一見而奇  
之

董遇及賈洪邯鄲淳薛夏隴禧蘇林樂詳等七人為儒

宗

王基為中書侍郎時散騎常侍王肅著諸經傳解及論定朝儀改易鄭玄舊說而基據持玄義嘗與抗衡

蜀許慈字仁篤師事劉禧善鄭氏學治易尚書三禮毛詩論語慈終於大長秋

譙周字允南為光祿大夫周雖不與政事以儒行見禮時訪大議輒據經以對而後生好事者亦咨問所疑馬來敏字敬達涉獵書籍善左氏春秋先主定益州署敏

典教校尉

廖扶習韓詩歐陽尚書教授嘗數百人不應辟名時號  
北郭先生二子孟舉並知名

張裔字君嗣治公羊春秋涉經史位至輔漢將軍  
文立字廣林少治毛詩三禮兼通羣書

伍梁字德山以儒學節操稱從議郎遷諫議大夫五官  
中郎將

向朗字巨達領丞相長史初朗少時雖涉獵文學然不

治素簡以吏能見稱自去長史優游無事垂三十年乃更潛心典籍孜孜不倦開門接賓誘納後進但講論古義不干時事以是見稱上自執政下及童冠皆敬重焉後以功封顯名亭侯位特進卒

吳張昭字子布彭城人少好學從白侯子安受左氏春秋博覽衆書位至輔吳將軍

諸葛瑾字子瑜少游京師治毛詩尚書左氏春秋後拜大將軍左都護領豫州牧

閻澤字德潤為太子太傅領中書每朝廷大議經典所疑輒諮詢之以儒學勤勞封都鄉侯

張紘字子綱廣陵人少游學京都紘入太學事博士韓宗治京氏易歐陽尚書又於外黃從濮陽閨受韓詩及禮記左氏春秋後曹公以紘為會稽東部都尉孫權以為長史卒

劉游舉孝廉為郎中祖父本師受經傳學羣書號為通儒舉賢良方正為殷長卒官伯父寵字祖榮受文業以

經明行修舉孝廉光祿大夫察四行除東平陵令  
程秉字德桓事鄭玄後避亂交州與劉熙考論大義遂  
博通五經士變命為長史孫權聞其名儒以禮徵秉既  
到拜太子太傅

嚴略字曼才少耽學善詩書三禮又好學文終於尚書  
令

沈珩字仲山吳郡人少綜經藝尤善春秋內外傳

晉何嵩字泰基寬弘愛士博觀墳籍尤善史漢少厯清

官領著作郎

閻纘字續伯，僑居河南新安。少游英豪，多所交結。博覽墳典，該通物理。纘位至漢中太守。

杜預為春秋左氏傳集解時，王濟解相馬，又甚愛之。而和嶠頻聚斂，預嘗稱濟有馬癖；嶠有錢癖。武帝聞之，謂預曰：「卿有何癖？」曰：「臣有左傳癖。」

侯使光儒博學古歷官著續文華奏議皆有條理。後終

於少府。

范甯為中書侍郎時更營新廟博求辟雍明堂之制甯據經傳奏上皆有典證孝武帝雅好文學甚被親愛朝廷疑議輒諮詢之

摯虞字仲治京兆長安人少事皇甫謐才學通博著述不倦歷官至太常卿

戴若思弟邈字望之少好學尤精史漢才不逮若思儒學過之弱冠舉秀才位至尚書僕射

范平字子安吳郡錢塘人研覽墳索初仕吳為臨海太

守謝病還家敦悅儒學三子奭咸泉並以儒學至大官  
杜夷字行齊廬江灊人世以儒學稱永嘉初公車徵拜  
博士不就

徐苗字仲胄高密淳于人累世相承皆以博士為郡守  
范弘之字長文雅正好學以儒術皆明為太學博士  
王歡字君厚樂陵人安貧樂道專精耽學遂為通儒嗣  
後慕容暉襲號署官至祭酒

王隱以儒素自守不交勢援博學多聞受父遺業西都

舊事多所諳究隱後為著作郎賜爵平陵鄉侯

袁亮字貞固有學行亮子粲文學博識累為儒官

涼茂字伯方少好學論議嘗據經典以處是非茂終於

太子太傅

康峻歷郡功曹舉計掾州辟從事太常鄭袤見峻大奇  
之舉為博士時重莊老而輕經史峻懼雅道陵遲乃潛

心儒典

郗鑑字道徽少孤貧博覽經籍躬耕隴畝吟詠不倦以

儒雅著名不應州命

陳邵字節良東海襄賁人郡察孝廉不就以儒學徵為陳留內史累遷燕王師

董景道字文博明春秋三傳京氏易馬氏尚書韓詩皆精究大義三禮之義專遵鄭氏著禮通論非駁諸儒演廣鄭旨至劉曜時徵為散騎常侍固辭遂以壽終

庾乘遊學宮為諸生脩後能講論自以卑等每處下坐諸生博士皆就讐問由是學中以下坐為貴

范宣雖閒居屢空嘗以講論為業譙國戴逵等皆聞風宗仰自遠而至諷讀之聲有若齊魯後詔徵為太學博士散騎郎並不就

華虞都督河北諸軍事坐事免官削爵土棲遲家巷垂十載教誨子孫講誦經典集經書要事名曰善文行於世

姜龕天水人姚興時與東平淳于岐馮翊郭高等皆耆儒碩德經明行修各門徒數百教授長安諸生自遠而

至者數千人興每於聽政之暇引龕等于東堂講論道  
藝錯綜明理涼州胡辨符堅之末來徙雒陽教授弟子  
百餘人關中後進多赴之講業興救關尉曰諸生諮詢  
道義修已厲行往來出入勿拘常限於是學者咸勸儒  
風盛焉

冊府元龜卷七百六十七

欽定四庫全書

冊府元龜卷七百六十八 宋 王欽若等 撰

總錄部

儒學第二

宋周續之字道祖晉時豫章太守范寧於郡立學招集生徒續之年十二受業居學數年通五經徵為太子博士不就高祖踐阼復召之為開館東郭外續之素患風痺不復堪講乃移病鍾山卒通毛詩六義及禮

雷次宗字仲倫少入廬山事沙門釋慧遠篤志好學尤明三禮毛詩時會稽朱膺之潁川庾蔚之竝以儒學總監諸生次宗初不受徵辟元嘉中徵至都開館於雞籠山車駕數至後卒於鍾山

劉湛字弘仁博涉史傳諳前世舊典後以詹事為丹陽尹

南齊關康之世居京口篤學以文義稱尤善左氏春秋高帝為領軍時素好此學送本與康之康之手自點定

徵之不就

張緒爲國子祭酒長於周易言精理奧見宗一時嘗云  
何平叔所不解易中七事諸卦中所有時義是其一也  
梁鍾嶸仕齊永明中爲國子生明周易衛將軍王儉領  
祭酒頗賞接之

何佟之字士威少好三禮讀禮論三百餘篇略皆上口  
仕齊爲國子助教

嚴植之字孝源少精解喪服孝經論語及長遍治鄭氏

禮周易毛詩左氏春秋仕齊爲廣漢王國右常侍天監  
四年兼五經博士

司馬筠字真素少孤貧好學師沛國劉瓛強力專精深  
為瓛所器及長博通經術尤明三禮卒於始興內史子壽  
傳父業明三禮位尚書祠部郎

卞華字昭岳幼孤貧好學年十四召補國子生通周易  
既長徧治五經與平原明山賓會稽賀陽同業友善天  
監中爲安城王功曹參軍兼五經博士

韋稜字威直性恬素以書史爲業博物強記當世士咸就質疑

沈峻字士嵩博通五經尤長三禮爲國子助教

崔靈恩清河武城人也少駕學從師徧通五經尤精三禮三傳仕魏爲太常博士天監中歸梁累遷步兵校尉兼國子博士

劉瓛講月令畢謂學生嚴植之曰江左已來陰陽律數之學廢矣吾今講此曾不得其彷彿學者美其退讓

庾於陵清警博學有才思隨齊王子隆爲荊州召爲主簿使與謝眺宗夬抄撰羣書

賀琛伯父瑒爲世碩儒授經於琛瑒卒後琛家貧嘗往還諸暨販粟以自給閑則習業尤精三禮卒光祿大夫徐勉爲尚書博通經史多識前載朝儀國典婚冠吉凶勉皆預圖議

蔡大寶少孤而篤學不倦善屬文初以明經對策第一解褐武陵王國左常侍嘗以書干僕射徐勉大爲

勉所賞異令與子游處所有墳籍盡以給之遂博覽羣書學無不綜

范遁順陽人散騎常侍廸之弟遁文采劣於廸而經術過之位至中衛東平王長史

宗希顏度支尚書如周之子有文學仕至中書舍人希華亦如周之子博通經術爲荆楚儒宗

陳龔孟舒治毛詩善談名理梁武世仕至潯陽郡丞元帝在江州遇之甚重躬師事焉

沈洙少方雅好學不妄交遊治三禮春秋左氏傳精識  
強記五經章句諸子史書問無不答初仕梁爲祠部郎  
中時年二十餘大同中學者多涉獵文史不爲章句而洙獨  
積思經術吳郡朱异會稽賀琛甚嘉之及异琛於士林  
館講制旨義嘗使洙爲都講

鄭灼幼而聰敏勵志儒學少受業於皇侃梁大通五年  
釋褐奉朝請

褚仲都善周易爲當時之冠篤志研翫得其精微梁太

清初厯王國侍郎奉朝請俄轉國子助教兼司議郎專  
講詩易

陸調少習崔靈恩三禮義梁時百濟國表求講禮博士  
詔令調行位至尚書祠部郎

岑之敬始以經業進而博涉文史雅有詞筆不愧醇儒  
官至征南府諮議叅軍

徐伯陽敏而好學善色養進止有節年十五以文學稱  
學春秋左氏家有史書所讀者近三千餘卷終於新安

王府誥議叅軍

沈文阿字國衛父峻以儒學聞於梁世授桂州刺史不行文阿性剛強有膂力少習父業研精章句祖舅太史叔明舅王慧興並通經術而文阿頗傳之又博採先儒異同自成義疏治三禮三傳

戚袞少聰慧遊學京都受三禮於國子助教劉文紹二年中大義略備

張譏爲國子助教是時周弘正在國學發周易題弘正

第四弟弘直亦在講習譏與弘正論議弘正乃屈弘直  
危坐厲聲助其申理譏乃正色謂弘直曰今日義集辨  
正名理雖知兄弟急難四公不得有助弘直曰僕助君  
師何爲不可舉座以爲笑樂

後魏梁越字玄覽新興人少而好學博綜經傳無所不  
通道武時爲禮經博士

梁祚北地人篤志好學厯治諸經尤善公羊春秋鄭氏  
易嘗以教授有儒者風而無當世之才與幽州別駕平

恒有舊友姊先適范陽李氏遂携家人僑居於薊積十  
餘年雖羈旅貧窘而著述不倦恒時相請屈與論經  
史

平恒字繼叔燕國薊人耽勤讀誦研綜經籍鉤深致遠  
多所博通厯中書博士祕書丞

劉獻之博陵饒陽人少而孤貧雅好詩傳曾受業於渤海  
程玄後遂博觀衆籍時中山張吾貴與獻之齊名海  
內皆曰儒宗太祖徵典內校書固以疾辭

劉蘭武邑人受春秋詩禮於中山王保安蘭讀左氏五  
日一遍兼通五經後爲國子助教卒

封軌爲考功郎中臺中稱爲儒雅奏請遣四門博士明  
經學者檢試諸州學生詔從之

賈思伯位都官尚書爲侍講思伯少雖明經從官廢業  
至是更延儒生夜講書

山偉爲侍中中書令愛尚文史老而彌篤

李都字永穆好學沈靜博通經史

游肇外寬內剛直耽好經傳手不釋書治周易毛詩尤  
精於三禮王肅自謂禮易爲長亦未能通其大義也位  
至散騎常侍都督淮南軍事揚州刺史

邢虬字神虎少爲三禮鄭氏學明經有文思舉秀才上  
第爲中書議郎

崔鴻字彥鸞少好讀書博綜經史

崔辯字神通博陵安平人學涉經史風儀整峻顯祖徵拜  
中書博士散騎侍郎

陽尼字景文北平無終人少好學博通經籍官至幽州  
平北府長史帶漁陽太守

索敵字巨振燉煌人爲劉昞助教專心經籍盡能傳昞  
之業涼州平入國以儒學見拔爲中書博士

宋欽少而好學有儒者之風博綜羣言聲著河右後拜  
著作郎

宋雅師事安邑李紹伯受諸經傳

李業興上黨人漁陽鮮于靈馥聚徒教授說左氏傳業

興問其大義數條靈馥不能對

張湛燉煌人好學能屬文仕沮渠蒙遜爲黃門侍郎涼州平入國崔浩識禮之浩注易叙曰國家西平河右燉煌張湛金城宋欽武威段根三人皆儒者並有雋才見稱於西州每與余論易余以左氏傳卦解之遂相勸爲注故因退朝之餘暇而爲之解焉其見稱如此

劉芳才思深敏特精經義長子懌字祖欣雅有父風頗好文翰位至太常卿

徐遵明字子判華陰人師光留王聰受毛詩尚書禮記  
後廣平王懷聞而徵焉至而尋退

北齊刁柔字子溫少好學綜習經史尤留心禮儀天保  
初除國子博士

馮偉字偉節中山安喜人少從李鉉遊學鉉重其聰敏嘗試  
問之多所通解尤明禮傳後趙郡王將舉充秀才固辭  
不就

邢峙字士峻河間鄚人少好學耽翫墳典遊學燕趙之

間通三禮左氏春秋天保初郡舉孝廉授四門博士  
馬敬德河間人少好儒術負笈隨大儒徐遵明學詩禮  
略通大義而不能精遂留意於春秋沉思研求晝夜不  
倦教授於燕趙生徒隨者甚衆州將送至都請試經業  
授國子助教遷博士

孫靈暉敏有器度得孫惠蔚手錄章疏研精尋問更  
求師友三禮三傳皆通宗旨舉冀州秀才射策高第累  
至國子博士授南陽王經府誥議叅軍子萬壽聰識機

警博涉羣書禮傳俱通大義

李鉉字寶鼎教授鄉里生徒嘗至數百燕趙間能言經者多出其門

劉軌思渤海人說詩甚精少事同郡劉敬和敬和事同郡程歸則故其鄉曲多爲詩者軌思天統中任國子博士

平鑒字明達燕趙薊人父勝安州刺史鑒少聰敏頗有志力受學於徐遵明不爲章句

鮑季祥渤海人甚明禮其離文析句自然大略可解兼通左氏春秋天統中卒於太學博士

劉偉好學善三禮吉凶儀制尤所留心位至睢州刺史後周樂遜字遵賢魏正光中聞碩儒徐遵明領徒趙魏乃就受孝經喪服論語詩書禮易左氏春秋大義厯太學助教博士

杜叔毗字子弼襄陽人勵精好學尤善左氏春秋仕梁為宜豐侯蕭循府中直兵參軍

韓褒字弘業少有志好學而不守章句其師怪而問之  
對曰文字之間嘗奉訓誘引至於商校異同請從所好  
師因此大奇之及長涉獵經史深沉有遠略

沈重字德厚吳興武康人專心儒學從師不遠千里遂  
博覽羣書尤明詩禮及左氏春秋梁大通三年起家王  
國常侍厯國子助教五經博士

竇熾少從范陽祁忻受毛詩左氏春秋略通大義位至

太傅

樊深字文深弱冠好學負書從師於三河講習五經晝夜不倦太祖置學東館教誨諸將子弟以深爲博士六年官建拜太學助教遷博士

庾信尤善春秋左氏傳

柳虬字仲蟠年十三便專精好學時貴遊子弟就學者竝車服華盛惟虬不事容飾遍受五經略通大義後爲車騎大將軍儀同三司

姚僧坦初仕梁爲湘東王府中記室叅軍僧坦好文史

不留意於章句時商略今古甚爲學者所稱

隋柳贊字顧言少聰敏解屬文好讀書所覽將萬卷仕

梁釋褐著作佐郎

杜臺卿字少山博陵曲陽人性儒素每以雅道自居及周武帝平齊歸于鄉里以禮記春秋教授子弟後仕至

著作郎

房暉遠字崇儒常山真定人世傳儒學暉遠幼有志行治三禮春秋三傳詩書周易北齊南陽王綽爲定州刺

史名爲博士周武帝平齊搜訪儒俊暉遠首膺辟命授少學下士及高祖受禪太常卿牛弘每稱爲五經庫吏部尚書韋世康薦之遷太學博士

辛彥之隴西狄道人九歲而孤不交非類博涉經史與天水牛弘同志好學周太祖見而器之引爲中外府禮曹開皇初爲國子祭酒

元善河南雒陽人少隨父至江南性好學遂通涉五經尤明左氏傳官至國子祭酒

蕭詵梁鄱陽王恢之孫性篤學詩書春秋禮記並通大  
義尤精漢書甚爲貴游所禮開皇初拜國子博士

馬光字榮伯武安人少好學從師數十年晝夜不息尤  
明三禮爲儒者所宗開皇初高祖徵山東義學之士光  
與張仲讓孔籠竇士榮張黑奴劉祖仁等俱至並授太  
學博士時人號爲六儒然皆鄙野無儀範朝廷不之貴  
也山東三禮學者自熊安生後唯宗光一人

楊伯丑好讀易隱於華山開皇初被徵入朝國子祭酒

何安嘗詣之論易聞安之言悠爾而笑曰何用鄭玄王弼之言乎玄之微有辯答其所說辭義皆異先儒之旨而思理玄妙論者以爲天然獨得非常人所及也

劉臻爲儀同三司左僕射精於兩漢書時人稱爲漢聖魏澹世以文學自業年十五而孤專精好學博涉經史善屬文詞采贍逸齊博陵王濟聞其名引爲記室

張文諲河東人父琚開皇中爲洹水令以清正聞名有書數千卷教訓子姪皆以明經自達文諲博覽文籍特

精三禮其周易詩書及春秋三傳竝皆通習每好鄭玄注解以爲通博其諸儒異說亦皆詳究焉高祖引致天下名儒碩學之士其房暉遠張仲讓孔寵之徒竝延之於博士之位文詡時游於太學暉遠等莫不推伏之學內翕然咸共宗仰

劉焯字士元信都昌亭人武強交津橋劉智海家素多墳籍焯就之讀書向經十載遂以儒學知名爲州博士時河間人劉炫聰明博學名亞於焯故時人稱二劉焉

論者以爲數百年已來博學通儒無能出其右者位至太學博士

張羨初仕後周爲司成中大夫與國史周代公卿類多武將唯羨以素業自通甚爲當時所重

褚輝字高明吳郡人以三禮學稱於江南煬帝時徵天下儒術之士悉集內史省相次講論輝博辯時無能屈者繇是擢爲太學博士

包愷字和樂東海人其兄愉明五經愷悉傳其業又從

王仲通受史記漢書尤稱精究大業中爲國子助教  
杜正玄字慎微其先本京兆人八世祖曼爲石趙從事  
中郎因家於鄴自曼至正玄世以文學相授

王孝籍平原人少好學博覽羣言遍治五經頗有文翰  
與河間劉炫同志友善

顧彪字仲文明尚書春秋大業中爲秘書學士

唐徐文遠雒州偃師人博覽五經尤精春秋左氏傳後  
周時有大儒沈重講于太學聽者嘗千餘人文遠就質

問數日便去或問曰何辭去之速答曰觀其所說悉是紙上語耳僕皆先已誦之至於與躋之境此君麤似未見有以其言告重者重與論義十餘反重甚歎服之馬嘉運隋末遊於劔南以講授爲務蜀士多賴其成益者貞觀初徵爲越王東閣祭酒頃之自免居於白鹿山四方受業者嘗數百十人

陸朗字德明吳郡人初受學於周弘正善言玄理仕陳爲國子助教時年尚少而與博士張機齊名武德中爲

秦府學士補太學博士

蓋文達信都人幼聰敏好讀書受業於同郡劉焯博涉經史尤明三傳性方雅美鬚貌見之者稱有君子之風時冀州刺史竇抗頗好文義乃廣集儒生令相難擊其大儒劉炫劉軌思等咸在講座文達與同郡孔穎達劉彥衡皆預焉既論難文達抗音而請皆出其意表抗大奇之因問曰蓋生就誰受學焯從坐起曰此生岐嶷出自天然以多問寡焯爲師首抗曰可謂冰生于水也

蓋文懿爲秘書博士嘗開講發毛詩題公卿咸萃更相問難文懿發揚風雅甚得詩人之致亦以儒業被知章句頗優而儀範不逮文達官至國子博士時稱二蓋

孔穎達信都人初受業於同郡劉焯然焯號爲通儒門人甚衆初不之禮穎達察焯不能出己之右於是請質疑滯皆出其意表焯改容敬之穎達因辭歸焯固留不可還家以教授爲務

朱子奢蘇州吳人少從鄉人顧彪習春秋左氏傳後更

觀子史善屬文隋末爲秘書學士武德四年隨杜伏威入朝授國子助教

張士衡瀛州樂壽人長從劉軌思受毛詩周禮又從熊安生及劉焯受禮記皆精究大義後遍講五經尤工三禮貞觀中爲崇賢館學士

蕭德言博涉經史尤精春秋左氏傳好屬文每欲開五經必盥濯束帶危坐終日如是貞觀中爲弘文館學士歐陽詢潭州臨湘人讀書數行俱下博覽經史尤精三

雅

谷那律魏州昌樂人貞觀中累補國子博士黃門侍郎  
褚遂良每稱爲九經庫

許叔牙潤州句容人尤明詩禮及史記漢書貞觀中累  
授晉王太學太常博士弘文館學士子儒亦傳父業

秦景通常州晉陵人與弟暉尤精漢書當時習漢書者  
皆宗師之嘗稱景通爲大秦君暉爲小秦君若不預其  
兄弟指授則謂之不經師匠無足採也

岑文本字景仁南陽棘陽人性沈敏有姿儀博考經史  
多所貫綜

高子貢和州歷陽人弱冠遊太學遍涉六經尤精史記  
厯秘書正字弘文館直學士

王紹宗少勤學遍覽經史尤工草隸家貧嘗傭力寫佛  
經以自給則天拜太子文學轉秘書少監紹宗性澹雅  
以儒素見稱當時朝廷之士咸敬慕之

祝欽明雍州始平人少通五經兼涉衆史舉明經長安

元年累遷太子率更令兼弘文館學士

尹知章絳州翼城人少勤學嘗夢神人以大鑿開其心  
以藥內之自是日益開朗盡通諸經精義未幾而諸師  
友北面受業焉長安中駙馬都尉武攸暨重其經學奏  
授其府文學

郭山惲蒲州河東人少通三禮景龍中累遷國子司業  
裴炎少補弘文生在館垂十年尤曉春秋左氏傳及漢  
書後以明經擢第

張東之字孟將襄陽人少補太學生涉獵經史尤好三禮國子祭酒令狐德棻重之

褚無量幼孤貧勵志好學及長精三禮及史記舉明經  
歷國子博士司業祭酒

馬懷素潤州丹徒人博覽經書善屬文舉進士文學優  
贍科歷秘書監昭文館學士

劉子玄本名知機與兄知柔俱以詞學知名代傳儒學  
之業子玄子貺博通經史

徐堅少好學遍覽經史爲東都留守王方慶判官方慶善三禮之學

吳兢汴州浚儀人勵志強學博通經史官至常山王傅李泌字長源周八柱國弼之裔也聰敏好學博涉經史精究易象及論語大義

馬位京兆人少有經學大歷初登五經秀才科建中末又登博學三史科累遷皇太子及諸王侍讀

鄭餘慶貞元中同平章事餘慶通究六經深旨奏對之

際多以古義傳之

張薦字孝舉祖文成博學工文詞性好談諧七登文學科薦聰明強記歷代史傳無不貫通爲太師顏真卿所稱賞遂知名

路泌少好學通五經尤嗜詩易左氏春秋能諷其章句皆究深旨子隨以通經累遷司勲郎中穆宗時與韋處厚同入翰林爲侍講學士

陸質吳郡人有經學尤深於春秋少師趙匡匡師啖助

助匡皆為奧儒質頗傳其學由是知名

許孟容京兆長安人父鳴謙究通易象官至撫州刺史孟容少以文詞知名舉進士後究王氏易登科

韋處厚通五經博覽史籍而文思贍速舉進士應賢良方正擢居異等

鄭絅字文明少有奇志好學善屬文大歷中有儒學高明如張叅蔣防楊綰常袞皆知重之

宇文籍字夏龜少好學尤通春秋性簡澹寡合耽玩經

史精於著作

崔植潛心經史尤精易象後爲中書侍郎平章事

劉貫字去華博學善屬文尤精史左氏春秋

殷侑爲兒童力學不怠家產長能通經以講習自娛五  
經登科第厯代公華擢爲太常博士

李德裕字文饒幼有壯志苦心力學尤精西漢書左氏

春秋

梁敬翔好讀書善禮學尤長刀筆應用敏捷

後唐藥縱之太原人少學爲儒依河東馬步軍都虞侯楊守業有書數千卷太原俗尚武儒者少故縱之以儒爲業攝代州衛推明宗刺代以依之官至曹州刺史馬縑少嗜儒書頗通經義五禮五樂嘗所經心而著述文章亦粗諧流輩位終國子博士

張憲字允中晉陽人世以軍功爲衛校憲始童丱喜儒學而勵志橫經不捨晝夜太原地雄邊服人多尚武恥於肄業唯憲與里人藥縱之精力遊學弱冠盡通諸經

尤精左傳後爲太原尹北京副留守

周司徒翊少好讀書通五經大義官至太常卿致仕

冊府元龜卷七百六十八